









producantur sine transmutatione subiecti cum abiectione contrarii, non oblat, quin verè educantur, quia ista sunt conditiones profus impertinentes ad educationem, nam educio non consistit in hoc, quod fiat in tempore, vel cum habitudine ad alterationem præcedentem, sed consistit in dependentia actionis, quia fit forma, à subiecto, immò ad veram, & physicam mutationem non requiritur abiectione contrarii, sed sufficit sola privatio præcedens in materia formæ subsequentis.

70. Neque in his formis, quæ non fiunt per propriam actionem, sed potius ad productionem subiecti per se referuntur dicuntur, implet talis resultantia, quin à suo subiecto educi dicantur; Tum quia tales formæ adhuc essentialiter pendunt in esse, & fieri à subiecto, ita ut neque per Dei potentiam fieri possint extra subiectum, quod præsertim verificatur de formis relativis, & modalibus, quæ ita petunt in Adversariorum sententia esse subiectis affixæ; ut sine illis fieri, & conservari prorsus repugnet; Tum quia licet propter hanc resultantiam dicantur comproduci, attamen ob hunc loquendi modum non intelligitur excludi qualicumque activitatem subiecti, quia subiectum re vera aliquo modo activè se habet ad illas, sed quia talis actio consequitur necessariò priorem, per quam subiectum producebatur, ideò non censetur propria, & per se actio, sicut ergo productio harum formarum non est sine aliqua activitate subiecti, ita non est sine aliqua educatione earum ex illo. Quod si ob necessariam sequelam huius actionis educivæ ad productivam subiecti velit quis dicere, huiusmodi formas non educi, sed coeduci, non infirmamur, quia hoc magis spectat ad modum loquendi, quam ad rem; & nobis sufficit, ut fiat cum vera dependentia à subiecto. Tum etiam, quia ex prædictis de natura educationis, ad causalitatem materialem sufficit prioritas naturæ subiecti ad formam, nec necessariò requiritur prioritas temporis, sed quantumcumque effectus dicatur suæ causæ cœvus, semper tamen causa censetur illum præcedere natura, ergo quantumcumque necessariò resultant formæ quædam accidentales ad productionem suorum subiectorum, semper tamen posteriores illis naturæ erunt, quod sufficit, ut ex eorum potentia dicantur educi; Tum tandem, quia etiam si relationes intrinsecas advenientes fieri, & resultant necessariò dicantur ad productionem extremorum, ut docet Scot. 1. dist. 17. quæst. 2. p. relationes tamen extrinsecas advenientes non ita necessariò resultant, sed actione propria produci possunt, immò & aliquæ motum terminant, ut docet Scot. 3. dist. 1. quæst. 1. & quod. 1. vide disp. 7. quæst. 2.

71. Ex his denique sequitur, omnes formas artificiales educi de potentia suorum subiectorum, quia formæ artificiales, ut Scot. in 4. dist. 1. quæst. 1. sub S. non fiunt, nisi quædam relationes, & figuræ resultantes in materia artificis ex tali incisione, vel compositione partium, unde de ipsis idem debemus ferre iudicium, quod de cæteris formis relativis, & partium refert, quod subiectum harum formarum non sit in potentia naturalis ad illas, sed obedientialis respectu artis humanæ, nam quidquid sit de hoc, de quo Doctor. videri potest 2. dist. 18. quæst. unic. C. jam ex doctrina superioris tradita de natura educationis habetur, quod necesse non est, subiectum esse in potentia naturali ad formam, quæ de ipso educi debet.

In oppositum obicitur 1. formas intentionales non fieri per educationem, quia educio est actio transmutativa subiecti, & per hoc à creatione distinguitur, sed species intentionales fiunt in subiecto sine abiectione contrarii, & lumen in medio, ergo &c. Accedit, huiusmodi qualitates non solum fieri in corporibus elementaribus, sed etiam in celestibus, at nulla forma educi potest de potentia Cœli, alias Cœlum alterabile foret, & reciperet peregrinas inpr. formas. Demum plures formæ educi nequeunt esse in eodem subiecto, at plures formæ intentionales esse possunt, ergo &c.

72. Resp. neg. assumptum, nam transmutatio impertinetes est ad educationem, ut docet Bassol. 2. dist. 13. quæst. unic. art. 2. ad 3. & potest fieri vera actio, & passio etiam sine motu, ut Scot. docet in 4. dist. 43. quæst. 5. L. & falsum est, educationem distingui à creatione essentialiter per mutationem, distinguuntur enim per dependentiam, vel independentiam, à subiecto, & denique falsum est, productionem formarum intentionaliū fieri sine transmutatione, etiam si non interveniat abiectione contrarii. Ad 2. non est inconveniens, Cœlum esse alterabile alteratione, ut ajunt per se, talis autem est alteratio, quæ fit per huiusmodi qualitates. Ad 3. assumptum non est universaliter verum.

Secundo Obicitur, quod qualitates conaturales, relationes, & aliæ formæ modales non fiunt per educationem, quia de ratione educationis est, ut forma fiat per actionem distinctam ab illa, quæ fit subiectum, terminet nempe propriam productionem pendente necessariò a concursu materiali subiecti, sed qualitates conaturales, quæ in subiectis fiunt per meram resultantiam ad productionem subiectorum, non fiunt per actionem distinctam ab ea, quæ fit subiectum, ergo &c. Deinde relationes, præsertim intrinsecas advenientes, eadem actione producuntur, quæ extrema, itaut non habeant aliam causam efficientem à causâ efficienti extremor. ex Scot. 1. dist. 17. quæst. 2. ergo à fundamento non educuntur. Tandem si formæ modales educerentur, etiam ipsa educio deberet educi, & esset propriè effectus materiæ, quod tamen falsum est, ut dicemus disp. de principiis in factio esse.

73. Resp. posse dupliciter intelligi, quod huiusmodi qualitates non habeant propriam actionem, & productionem diverfam à

productione subiecti, primò in hoc sensu, quod nullam omnino terminent actionem, sed secundariò producuntur per actionem substantialem, quæ fit subiectum, & ex vi eisdem actionis in eo resultant, & ita falsum est, quia ex vi actionis substantialis nunquam haberi potest terminus accidentalis, ut Scot. docet in 4. dist. 10. quæst. 1. B. quæ secundum veram Philosophiam, substantiam, & accidentis diversas semper terminant actiones, nec eadem actione fieri possunt, & ideò nec primariò, nec secundariò haberi potest accidentis per actionem substantialem; vel ita intelligi potest, quod habeant quidem propriam actionem distinctam ab actione productiva subiecti propria tamen, & per se actio non censetur, quia natura sua consequitur, & resultat à termino alterius actionis, unde nec propriam habet novitatem, nec ut terminus potest acquiri per motum, sed tamen per naturalem resultantiam, & ita verum est, quod non habent propriam actionem, nec propriam terminant productionem, sed ex hoc non bene inferitur, quod non educantur de potentia subiecti, quia ad veram educationem sufficit, quod forma fiat per propriam actionem in hoc secundo sensu; enim intelligitur intervenire concursus materialis subiecti. Ad 2. patet per idem, namque relationes etiam habent propriam productionem in hoc secundo sensu, neque Scot. cit. hanc denegavit extremis, sed tantum illam, quæ sufficit ad motum, ut dicitur Disp. de Relat. Ad 3. sicut actio, & productio se ipsa disjungunt ab agente dimanare, & non media alia actione, ita educio eodem modo dici debet pendere à subiecto, unde sicut productio dicitur fieri, ut Quo, ab agente, ita & educio, ut Quo dicitur fieri ex subiecto, unde & ipsa suo motu à materia pendebit, licet non propriè, ut eius effectus, sed tantum ut eius casualitas.

ARTICULUS II.

Resolutio. Quæst. de formis Supernaturalibus.

74. Dicimus, probabile esse, non solum actus supernaturales, sed etiam habitus educi de potentia sui subiecti. Hæc concl. probari potest 1. ex dictis in Concl. præced. Tum quia omnis forma accidentalis, cum sit apta inherere subiecto, quævisque est fieri, & conservari dependet ab eo, & ideò cum omnes formæ supernaturales in ratione accidentis conveniant cum formis naturalibus, poterunt & ipsæ, ac debebunt educi de potentia suorum subiectorum, sicut & naturales, cum hoc dicitur tantum, quod habitus supernaturales immoediè educuntur à Deo; Tum quia ideò anima rationalis dicitur creari, & non educi de corpore, licet in nullo instanti etiam naturæ prius sit in se, quam in corpore, cum existentia rei non mensuratur per instanti naturæ, quia de se nata est subsistere, unde quantumcumque in corpore producat, semper independentè ab eo producit, & illud respicit, ut subiectum mere in quo, non ex quo, ergo cum habitus supernaturales non sint formæ natæ per se subsistere si in primo instanti, quæ sunt, sunt in subiecto, planè ex eo educuntur, nam hoc est, formam educi de potentia materiæ, non prius in produci, quam in subiecto, si est forma nata inherere; Tum etiam si gratia produceretur in uno instanti creata, deinde animæ infusa, etiam si in fieri à subiecto non dependeret, adhuc tamen dependeret in conservari, quia non est forma subsistens, ut anima, atque ita consequenter eius defectio erit corruptio, & non annihilatio, quia definit in subiecto, à quo dependebat in conservari, ex quo postea sequitur, quod etiam per educationem incipere debeat, si definit per corruptionem; Tum deinde, quia Scot. ipse 4. dist. quæst. 1. H. omnem illam formam vocat materialem, id est materia educitam, vel educibilem, quæ ex natura sua necessariò inclinatur naturaliter, ut sit actus materiæ, ita quod suapte natura aliter nequeat existere, sed per hoc excluditur sola anima rationalis, quæ non cum tali necessitate inclinatur, ut sit actus materiæ, quia suapte natura, & secluso miraculo potest extra illam existere; Tum denique actus supernaturales educuntur de potentia subiecti ex Scot. 1. dist. 17. quæst. a. Pp. ergo idem dici poterit, & debet, etiam de habitibus nam nulla ratio potest adduci de habitibus, quæ non elidatur in actibus.

Deinde Prob. post Conclusionem, eo quia nulla suppetit ratio convincens ad oppositum, ut patebit dicendo per singulas rationes, & capita, ex quibus solent Scotistæ probare, gratiam, & cæteros habitus supernaturales creari. Vel enim probaretur ex existentia, & excellentia horum habituum, ut probant Fuentes, & Faber, non ita excellentes sunt habitus illi in ordine gratiæ, & gloriæ, sicuti anima rationalis in serie naturæ, ergo petunt à Deo creari sicut anima. Item habitus illi elevant animam, & eius potentias supra totum esse naturæ, & præsertim gratia est participatio quædam divinæ naturæ, ergo non possunt huiusmodi formæ tam excellentes virtualiter contineri in causis naturalibus, cum principium naturale habeat nequeant, quæ de causa dicitur in Psalm. 83. gratiam, & gloriam dedit Dominus, &c.

75. Sed ratio hæc non convincit, & refunditur in actibus, nam etiam actus sunt ordinis superioris, & gratuiti, immò sunt formæ excellentiores ipsis habitibus, ut omnes fatentur, & nos suo loco dicimus in lib. de Anim. & apud omnes certum est, visum esse beatificam esse gratia excellentiorem, & etiam ipsi actus elevant animam supra totum esse naturæ, ergo sicuti actus educuntur, ita dici poterit de habitibus, & quando ait Pfalter. gratiam, & gloriam dari à Domi-

à Domino, utique neque non intelligit concursum materialem ex parte creaturæ; per gloriam enim intelligit visum, & gratiam, ad quas secundum omnes conaturat intellectus, & voluntas Beatorum, nedum in genere causæ materialis, sed etiam efficientis. Sic etiam quando communiter dicitur, formam supernaturalem non contineri in causa naturali, id totum intelligitur in genere causæ efficientis, quatenus homo non potest ex suis viribus attingere aliquid actum supernaturalem sine speciali auxilio Dei, non autem per hoc excluditur concursus creaturæ: in genere causæ materialis, immò majori ratione videtur. Scotistæ posse, ac debere defendere hanc Concl. quæ Thomistæ, quia gratia secundum Thomistam est forma ex natura rei hominem iustificans, & Deo gratum reddens, & tantæ excellentiæ, ut neget in creatura potentiam etiam passivam naturalem in ordine ad illam, sed Scotistæ inquit, hoc minus competere gratiæ ex naturali, sed tantum ad eam, sicut & ad cætera dona supernaturalia, ergo posteriori ratione possunt hanc Concl. asserere Scotistæ, quam Thomistæ. Paritas tandem assumpta à Fuentes de anima rationali in serie naturæ, & de gratiæ, & cæteris habitibus in ordine gratiæ, & gloriæ, non tenet, quia anima rationalis est forma substantialis, & spiritualis, & ideò attingit nequit à potentia generativa in genere causæ efficientis, & est forma per se subsistens, & hæc de causa concursum in genere causæ materialis, etiam excludens, at habitus supernaturales, licet ob eorum excellentiam excluderent omnem causam secundam efficientem, quia tamen sunt formæ accidentariæ, causam materialem non excludunt.

76. Vel oppositum Concl. nostræ probaretur ex supernaturalitate habituum, ut idem Fuentes supra cit. insinuat, quia nimirum habitus illi ab intrinseco, & substantialiter dicuntur supernaturales, atque ideò petunt ab intrinseco à solo Deo produci, & creari. Sed hæc etiam ratio non valet, nam præterquamquod non est omnino certum, an gratia sit supernaturalis ab intrinseco, & secundum substantiam, cum effectus supernaturalis eius reddendi hominem. Deo gratum attendatur à Scotistis penes extrinsecum Dei decretum, non autem eius naturam; adhuc retunditur in actibus, quia etiam actus sunt supernaturales, & aliqui communiter asserunt supernaturales secundum substantiam, ut visio, & fruitio beata, quia tamen adhuc ponuntur educi de potentia subiecti, ergo supernaturalitas non impedit educationem habituum supernaturalem ex suis subiectis.

Vel probaretur oppositum Concl. ex spiritualitate habituum supernaturalium, ut facit Pater Vulpes loc. cit. disp. 3. art. 1. n. 8. quia si gratia educeretur de potentia subiecti, & alii habitus supernaturales, non amplius essent formæ spirituales, sed materiales; Tum quia omnis forma educita de potentia materiæ dicitur materialis, Tum quia hæc præcisè de causa anima intellectiva est spiritualis, quia non educitur de potentia sui subiecti, quod si ex eo educeretur, statim evaderet forma materialis. Accedit, quod si gratia, & cætera dona supernaturalia educuntur de potentia subiecti, poterit agens naturale, naturaliter, & immoediè sua virtute attingere prædictas formas, cum limitatio visæ potentie solum prohibeat aliquid simpliciter de nihilo producere, seu independentè ab omni subiecto.

Sed neque hæc ratio arguit, quia falsum est, quæcumque educationem de potentia subiecti facere formam materialem, nam species intelligibiles, & actus intelligendi, & volendi educuntur de potentia animæ, & tamen materiales non sunt, hoc est formæ corporeæ, & extensæ; & in sententia ipsius Vulpes actus supernaturales educuntur de potentia subiecti, & tamen adhuc sunt spirituales; solum ergo educio formæ de potentia subiecti corporeæ, & extensæ facit formam materialem corpoream, & extensam, & hæc de causa rationalis anima extensam, & corpoream di-

cederet, si de subiecto educeretur, quia eius subiectum est corporeum & extensum. At educio formæ de subiecto incorporeo non reddit ipsam materialem in hoc sensu, id est corpoream, & extensam, sed materialem in eo sensu, quo Scot. loquitur 4. dist. 1. quæst. 1. H. ubi illam formam appellat materialem, quæ nata est à materia dependere, & non in se subsistere. Falsum item est, quod subdit Vulpes, posse agens naturale attingere immoediè omnem formam educibilem de potentia materiæ naturaliter, & ex suis viribus, nam anima sensitiva, & vegetativa formæ sunt materiales, & ex materia educibiles, & tamen à multis ponuntur immoediè à Deo educi, & actus supernaturales in sententia etiam illius Auctoris educuntur, & tamen naturaliter attingi nequeunt.

77. Denique quod Scot. inclina verit in oppositum præter, nos detertere non debet à Concl. posita, nam ubiquequæ ponit, gratiam, & cætera dona creari, vel loquitur conditionatè, ut in 1. dist. 17. quæst. a. Pp. vel textus signatur pro extra, ut in eadem distinctio præp. finem, vel loquitur ad hominem, ut in quadam dist. 1. quæst. 5. contra istam opinionem, &c. & §. Ad primam ergo quæst. &c. ubi enim ex eo præsertim probare contendit contra Div. Thom. Sacramenta non esse causas physicas gratiæ, nec principales, nec instrumentales, quia gratia in sententia D. Thom. creatur, & creatura nequit creare, nec principaliter, nec instrumentaliter, & quod loquatur ad hominem, patet præsertim ex §. Contra istam opinionem, &c. ubi arguendo contra Div. Thom. inquit, animam esse in potentia obedientialiter ad formas supernaturales, cum tamen in sententia Doctoris sit in potentia naturali passiva, unum dumtaxat locum invenimus non ab aliis citatum, quod viderimus in 3. dist. 11. quæst. 1. §. Cui ista opinio, &c. ubi ait, Angelum, animam, & gratiam propriè creari, quia de nihilo producuntur, & ita loquitur, ne recederet à communi modo loquendi Scripturarum, & Patrum, qui dicunt, gratiam in nobis à Deo creari, vel concreari, quæ tamen auctoritates possent explicari, ut D. Thom. explicat 1. 2. quæst. 110. art. 2. ad 3. ubi ita loquitur: gratia dicitur creari ex eo quod homines secundum istam cōtentionem, id est in novo esse constituantur ex nihilo, id est non ex merito, secundum illud ad Eph. 2. creari in Christo Jesu in operibus bonis; itaque sensus Scripturarum, & Patrum est, gratiam creari, & de nihilo produci secundum esse morale, non autem secundum esse naturale illius, ut notavit Vulpes supra cit. Qui igitur vult sustinere non communiori, & non minus probabili, gratiam, & cætera dona supernaturalia creari, id tenere debet ob auctoritates Sanctorum, Scripturarum, & Scholasticorum antiquiorum, quorum auctoritati maxime est tribuendum, non autem ob aliquam rationem cogentem, quia re vera nulla talis, sed adeo, immò potius urgetiū oppositum.

78. In contrarium obicitur, quod sustinendo, gratiam educi cum Recentioribus, cogitur etiam cum eisdem ponere, Sacramenta physice gratiam causare, & non moraliter, nam ideò ipsi dicunt, gratiam educi, ut destruant præcipuum fundamentum nostræ sententiæ de moralis causalitate Sacramentorum, quia scilicet gratia creatur, & ideò nequit physice à creatura attingi.

Resp. negando assumptum, non enim defunt solidæ rationes ad probandum adhuc Sacramenta physice gratiam non causare, quia nimirum nequeunt res corporeæ, & materiales, ut sunt Sacramenta, elevari ad producendum gratiam, quæ est spiritualis, & etiam quia, excepta Euchariis, Sacramenta quando producant gratiam, physice loquendo, non fiunt, sed id, quod physice non est, physice operari non potest, quia operari supponit esse, quæ ratio validissima est, nec etiam defunt alie rationes ad idem, etiam si gratia ponatur educi de potentia animæ, & quando Scot. utitur illa ratione, Sacramenta scilicet non posse physice gratiam causare, quia gratia creatur, loquitur ad hominem, ut diximus & ex communiter concessis.